

სამოსამართლო გამოცდილების მქონე მოსამართლეობის კანდიდატის შეფასების ფორმა

მოსამართლეობის კანდიდატის ლაშა თავართქილაძის შეფასების შედეგი:

მოსამართლეობის კანდიდატის შეფასება კეთილსინდისიერების კრიტერიუმის მიხედვით		
მოსამართლეობის კანდიდატი არ აკმაყოფილებს კეთილსინდისიერების კრიტერიუმს	☐	
მოსამართლეობის კანდიდატი აკმაყოფილებს კეთილსინდისიერების კრიტერიუმს	☐	
მოსამართლეობის კანდიდატი სრულად აკმაყოფილებს კეთილსინდისიერების კრიტერიუმს	☒	
მოსამართლეობის კანდიდატის შეფასება კომპეტენტურობის კრიტერიუმის მიხედვით		
კრიტერიუმი	მიღებული ქულა	მაქსიმალური ქულა
სამართლის ნორმების ცოდნა	18	20
სამართლებრივი დასაბუთების უნარი და კომპეტენცია	18	20
წერის უნარი	18	20
ზეპირი კომუნიკაციის უნარი	14	15
პროფესიული თვისებები, მათ შორის, ქცევა სასამართლო დარბაზში	13	15
აკადემიური მიღწევები და პროფესიული წვრთნა	4	5
პროფესიული აქტივობა	4	5
ქულათა ჯამი	89	100

შემფასებელი:



ნიკოლოზ მარსაგიშვილი
თარიღი: 14.04.2025



საქართველოს იუსტიციის უმაღლესი საბჭოს მდივანი ნიკოლოზ მარსაგიშვილი

საქართველოს უზენაესი სასამართლოს მოსამართლის შერჩევის პროცედურაში
მონაწილე კანდიდატის - **ლაშა თავართქილაძის** შეფასების დასაბუთება

საქართველოს იუსტიციის უმაღლესი საბჭოს 2024 წლის 30 დეკემბრის №1/161 განკარგულებით (ცვლილება შევიდა საქართველოს იუსტიციის უმაღლესი საბჭოს 2024 წლის 31 დეკემბრის №1/163 განკარგულებით) დაწესებული, უზენაესი სასამართლოს მოსამართლის თანამდებობაზე ასარჩევად საქართველოს პარლამენტისათვის წარსადგენი კანდიდატის შერჩევის პროცედურის ფარგლებში კანდიდატ ლაშა თავართქილაძის შეფასების დასაბუთების შედგენის პროცესში ვიხელმძღვანელებ „საერთო სასამართლოების შესახებ“ საქართველოს ორგანული კანონის 34¹-ე მუხლის მე-11 პუნქტით დადგენილი წესით.

1. კანდიდატის შეფასება კეთილსინდისიერების კრიტერიუმის მახასიათებლების მიხედვით

კანდიდატი კეთილსინდისიერების კრიტერიუმით შეფასდა „საერთო სასამართლოების შესახებ“ საქართველოს ორგანული კანონის 35¹ მუხლით დადგენილი მახასიათებლების მიხედვით.

„საერთო სასამართლოების შესახებ“ საქართველოს ორგანული კანონის თანახმად, იმის დასადგენად, თუ რამდენად აკმაყოფილებს კანდიდატი ლაშა თავართქილაძე კეთილსინდისიერების კრიტერიუმს, წინამდებარე დასკვნაში წარმოდგენილი და გაანალიზებულია მისი შეფასება აღნიშნული კრიტერიუმის თითოეულ მახასიათებელთან მიმართებით. კერძოდ, როგორც არის - პიროვნული კეთილსინდისიერება და პროფესიული სინდისი; დამოუკიდებლობა, მიუკერძოებლობა და სამართლიანობა; პიროვნული და პროფესიული ქცევა; პიროვნული და პროფესიული რეპუტაცია და ფინანსური ვალდებულება.

აღსანიშნავია, რომ კეთილსინდისიერების კრიტერიუმით ლაშა თავართქილაძის შეფასება დაეყრდნო კანდიდატის შესახებ მოძიებულ ინფორმაციას, რა დროსაც სხვადასხვა უწყებებიდან მის შესახებ გამოთხოვილ იქნა შემდეგი სახის ინფორმაცია: საქართველოს შინაგან საქმეთა სამინისტროდან და ქალაქ თბილისის მუნიციპალიტეტის ტრანსპორტისა და ურბანული განვითარების სააგენტოდან - მონაცემები ადმინისტრაციული სამართალდარღვევების შესახებ; სს „კრედიტინფო საქართველოდან“ - სრული პერსონალური საკრედიტო ინფორმაცია; საქართველოს ფინანსთა სამინისტროს შემოსავლების სამსა-

ხურიდან - ცნობა შემოსავლების შესახებ; ანტიკორუფციული ბიუროდან - ქონებრივი მდგომარეობის დეკლარაცია; კანდიდატის სამუშაო ადგილიდან - ინფორმაცია დისციპლინური სამართალწარმოების შესახებ. ლაშა თავართქილაძის დახასიათების მიზნით, მასთან სამსახურებრივ და პირად ურთიერთობაში მყოფი პირებისაგან მიღებულ იქნა შევსებული სპეციალური ფორმის რეკომენდაციები, კითხვარები და სხვა. ამასთან, ლაშა თავართქილაძის შეფასებისას გავითვალისწინე მის მიერ შევსებულ განაცხადში მითითებული ინფორმაცია და საჯარო მოსმენისას უშუალოდ კანდიდატის მიერ გამოვლენილი თვისებები.

კანდიდატის პიროვნული კეთილსინდისიერებისა და პროფესიული სინდისის მახასიათებლის მიხედვით შეფასებისას მხედველობაში მივიღე, რომ ლაშა თავართქილაძის შესახებ გამოკითხული პირები და რეკომენდატორები მას ახასიათებენ დადებითად. გამოარჩევენ მის პატიოსნებას, კეთილსინდისიერებას, მოვალეობების და პასუხისმგებლობის მაღალ შეგნებასა და სხვა დადებით თვისებებს. რესპოდენტები მიუთითებენ, რომ კანდიდატი სრულად აკმაყოფილებს კეთილსინდისიერების კრიტერიუმს.

ზემოაღნიშნულ ინფორმაციაზე დაყრდნობით შესაძლებელია დავასკვნათ, რომ ლაშა თავართქილაძეს გააჩნია პასუხისმგებლობისა და მოვალეობების მაღალი შეგნება და სამსახურებრივ თუ სხვა სახის მოვალეობებს, მათ შორის, ფინანსურ ვალდებულებებს ის ასრულებს ჯეროვნად. ადმინისტრაციული სამართალდარღვევის ჩადენის გამო დაკისრებული ჯარიმა ლაშა თავართქილაძეს გადახდილი აქვს დროულად.

დამოუკიდებლობის, მიუკერძოებლობისა და სამართლიანობის მახასიათებელს რაც შეეხება, გამოკითხული რეკომენდატორები კანდიდატს აფასებენ, როგორც პიროვნულად მტკიცე, შეუვალ და დამოუკიდებელ პიროვნებას. აღნიშნავენ, რომ კანდიდატს შეუძლია გადაწყვეტილების დამოუკიდებლად მიღება, გამოირჩევა პროფესიული პრინციპულობით. რაც შეეხება კანდიდატის პოლიტიკური ან სხვა ნიშნით მიუკერძოებლობის საკითხს, უნდა აღნიშნოს, რომ იგი არ ყოფილა არცერთი პოლიტიკური პარტიის წევრი, მხარდამჭერი ან/და შემომწირველი და საჯარო მოსმენაზეც მისი მხრიდან არ გამოვლინდა პოლიტიკური ან სხვაგვარი მიკერძოებულობის ნიშნები.

პიროვნული და პროფესიული ქცევის მახასიათებელთან დაკავშირებით აღსანიშნავია, რომ ლაშა თავართქილაძე თავდაჭერილია და მართავს საკუთარ ემოციებს. კანდიდატის საჯარო მოსმენის შედეგად დამრჩა შთაბეჭდილება, რომ ის არის მოტივირებული და კორექტული. გავითვალისწინე, რომ კანდიდატის წინააღმდეგ დისციპლინური დევნა ან/და სისხლისსამართლებრივი წარმოება არ მიმდინარეობს. ამასთან, საქართველოს გენერალური პროკურატურიდან გამოთხოვილი ინფორმაციით დასტურდება, რომ 2018 წლის 29 ივნისს კანდიდატი ცნობილია დაზარალებულად სისხლის სამართლის საქმეზე, საქართველოს სისხლის სამართლის კოდექსის 366-ე მუხლის მე-2 ნაწილით გათვალისწინებული დანაშაულის ჩადენის გამო. საერთო სასამართლოებში წარმოებულ დავებში კანდიდატის მხარედ მონაწილეობის თაობაზე საქმისწარმოების ელექტრონული საძიებო სისტემის მეშვეობით მოძიებულ იქნა ერთი ადმინისტრაციული საქმე, სადაც საჩივრის ავტორი ლაშა თავართქილაძეა, მოპასუხე მხარე - საპატრულო პოლიციის დეპარტამენტი,

დავის საგანი - ინდივიდუალური ადმინისტრაციულ-სამართლებრივი აქტის ბათილად ცნობა. ხელვაჩაურის რაიონული სასამართლოს 2017 წლის 23 ოქტომბრის განჩინებით, ლაშა თავართქილაძის საჩივარი დაკმაყოფილდა.

პიროვნული და პროფესიული რეპუტაციის მახასიათებლის მიხედვით კანდიდატის პიროვნულ თვისებებს, ისევე როგორც მის პროფესიულ მიღწევებს რეკომენდატორები და გამოკითხული პირები აფასებენ დადებითად. ამასთან, იუსტიციის უმაღლესი საბჭოს საზოგადოებასთან და მედიასთან ურთიერთობის სამსახურის მიერ მოწოდებული ინფორმაციის თანახმად, ლაშა თავართქილაძის შესახებ ინტერნეტ სივრცეში ხელმისაწვდომია ინფორმაცია მის სამოსამართლო საქმიანობასთან, მის მიერ განხილულ განმარტებულ საქმეებთან და უზენაესი სასამართლოს მოსამართლის შესარჩევ კონკურსში მონაწილეობასთან დაკავშირებით.

ფინანსური ვალდებულების მახასიათებელთან დაკავშირებით შესაძლებელია ითქვას, რომ ლაშა თავართქილაძე ჯეროვნად და კეთილსინდისიერად ასრულებს ფინანსურ ვალდებულებებს, აქვს მიმდინარე სესხები დადებითი საკრედიტო ისტორიით, სახელმწიფო ბიუჯეტის მიმართ დავალიანება არ ერიცხება და მეწარმეთა და არასამეწარმეო იურიდიულ პირთა რეესტრში რეგისტრირებული არ არის. ამრიგად, კანდიდატის ფინანსური ვალდებულებების შემოწმების შედეგად გამოიკვეთა, რომ არ არსებობს მისი ქონებრივი ინტერესების მართლმსაჯულების ინტერესებთან დაპირისპირების საფუძველი, რამაც შესაძლოა შემდგომში საფრთხის ქვეშ დააყენოს მოსამართლის მიუკერძოებლობა.

ყოველივე ზემოაღნიშნულის და თითოეული მახასიათებლის გაანალიზების შედეგად, ვინაიდან არ გამოიკვეთა გარემოება, რაც ეჭვქვეშ დააყენებდა კანდიდატის კეთილსინდისიერებას, ამ კრიტერიუმის ხუთივე მახასიათებლით შემოწმებისას კანდიდატი შევადგას სრულად დადებითად და მიმაჩნია, რომ „საერთო სასამართლოების შესახებ“ საქართველოს ორგანული კანონის 35¹ მუხლის მე-15 პუნქტის „გ“ ქვეპუნქტის შესაბამისად, **ლაშა თავართქილაძე სრულად აკმაყოფილებს კეთილსინდისიერების კრიტერიუმს.**

2. კანდიდატის შეფასება კომპეტენტურობის კრიტერიუმის მახასიათებლების მიხედვით:

უზენაესი სასამართლოს მოსამართლის თანამდებობაზე ასარჩევად საქართველოს პარლამენტისათვის წარსადგენი კანდიდატის შერჩევის პროცედურაში მონაწილე კანდიდატი კომპეტენტურობის კრიტერიუმის მიხედვით შეფასდა „საერთო სასამართლოების შესახებ“ საქართველოს ორგანული კანონის 35¹ მუხლის მე-17 პუნქტით დადგენილი წესით.

„საერთო სასამართლოების შესახებ“ საქართველოს ორგანული კანონის თანახმად, კომპეტენტურობის კრიტერიუმის საფუძველზე კანდიდატ ლაშა თავართქილაძის შეფასებისას მხედველობაში იქნა მიღებული აღნიშნული კრიტერიუმის თითოეული მახასიათებელი. კერძოდ, როგორებიც არის: სამართლებრივი ნორმების ცოდნა; სამართლებრივი დასაბუთების უნარი და კომპეტენცია; წერის უნარი; ზეპირი კომუნიკაციის უნარი; პროფესიული თვისებები, მათ შორის - ქცევა სასამართლო დარბაზში; აკადემიური მიღწევები და პროფესიული წვრთნა, პროფესიული აქტივობა. აღსანიშნავია, რომ კომპეტენტურობის

კრიტერიუმით კანდიდატის შეფასება დაეყრდნო კანდიდატის შესახებ მოძიებულ ინფორმაციას, მის მიერ წარმოდგენილი გადაწყვეტილებების და განჩინების შესწავლით მიღებულ ინფორმაციასა და საჯარო მოსმენის შედეგად შექმნილ შთაბეჭდილებას.

სამართლებრივი ნორმების ცოდნის მახასიათებლის მიხედვით კანდიდატის შეფასებისას გავითვალისწინე საჯარო მოსმენის დროს მის მიერ გამოვლენილი მატერიალური და საპროცესო კანონმდებლობისა და ადამიანის უფლებების სამართლის ცოდნის დონე და, აგრეთვე, - მის მიერ განხილულ საქმეებზე გამოტანილ გადაწყვეტილებებში შესაბამისი სამართლის ნორმების გამოყენების სისწორე.

კანდიდატის - ლაშა თავართქილაძის საჯარო მოსმენა იუსტიციის უმაღლეს საბჭოში გაიმართა 2025 წლის 6 მარტს, რა დროსაც საბჭოს წევრებმა მას დაუსვეს არაერთი ზოგადი და კონკრეტული სამართლებრივი ხასიათის შეკითხვა. შეფასების პროცესში ასევე შესწავლილი იქნა ლაშა თავართქილაძის მიერ განხილულ საქმეებზე წარმოდგენილი გადაწყვეტილებები, კერძოდ, - თბილისის სააპელაციო სასამართლოს სამოქალაქო საქმეთა პალატის 2023 წლის 01 ივნისის განჩინება №2/ზ-5397-22; თბილისის სააპელაციო სასამართლოს სამოქალაქო საქმეთა პალატის 2023 წლის 12 ოქტომბრის გადაწყვეტილება №2/ზ-2438-23; თბილისის სააპელაციო სასამართლოს სამოქალაქო საქმეთა პალატის 2024 წლის 22 თებერვლის №2/ზ-231-23 გადაწყვეტილება; თბილისის სააპელაციო სასამართლოს სამოქალაქო საქმეთა პალატის 2024 წლის 28 ივნისის №2/ზ-1930-24 გადაწყვეტილება.

კანდიდატის მიერ წარმოდგენილი გადაწყვეტილებებისა და განჩინების შესწავლისა და საჯარო მოსმენის შედეგად შემიძლია დავასკვნა, რომ ლაშა თავართქილაძე კარგად ფლობს სამოქალაქო და ადმინისტრაციული სამართლის მატერიალურ და საპროცესო კანონმდებლობას. გასაუბრებისას დასმულ შეკითხვებზე მისი პასუხები იყო ძირითადად ვრცელი და არგუმენტირებული, რა დროსაც იშველიებდა საკუთარ პრაქტიკულ გამოცდილებას და საქართველოს უზენაესი სასამართლოს მიერ დადგენილ პრაქტიკას. უნდა აღინიშნოს, რომ ლაშა თავართქილაძეს გააჩნია მოსამართლედ მუშაობის თითქმის 11 წლიანი გამოცდილება და მოსამართლე უფლებამოსილებას ახორციელებდა პირველი ინსტანციისა და სააპელაციო სასამართლოებში, როგორც სამოქალაქო, ისე ადმინისტრაციულ საქმეთა პალატაში. საჯარო მოსმენის დროს კანდიდატმა ასევე წარმატებით გაართვა თავი საერთაშორისო სამართლებრივ საკითხებზე დასმულ შეკითხვებს. აქვე უნდა აღინიშნოს, რომ მან არავრცელი პასუხები გასცა ადმინისტრაციულ სამართალდარღვევებთან დაკავშირებით დასმულ ზოგიერთ შეკითხვას.

საბოლოოდ მიმაჩნია, რომ ლაშა თავართქილაძე კარგად იცნობს სამოქალაქო და ადმინისტრაციული სამართლის მატერიალურ და საპროცესო კანონმდებლობას. კანდიდატმა დასმულ საკითხებზე დააფიქსირა კვალიფიციური პასუხები.

კანდიდატის სამართლებრივი დასაბუთების უნართან და კომპეტენციასთან დაკავშირებით კიდევ ერთხელ უნდა აღინიშნოს, რომ ლაშა თავართქილაძეს აქვს პირველი და სააპელაციო ინსტანციის სასამართლოებში მოსამართლედ მუშაობის ხანგრძლივი, თითქმის თერთმეტწლიანი გამოცდილება. მიმაჩნია, რომ კანდიდატის მიერ ჩამოყალიბებული მოსახრებები ფაქტობრივი და სამართლებრივი თვალსაზრისით არგუმენტირებული და

დასაბუთებულია. გასაუბრების პროცესში გაირკვა, რომ კანდიდატის მოსაზრებები, განსაკუთრებით სამართლის პრაქტიკული და თეორიული საკითხების გარშემო, არის კვალიფიციური და თანმიმდევრული.

კანდიდატის **წერის უნარის** შეფასებისას გავითვალისწინე ლაშა თავართქილაძის მიერ საქმეთა განხილვის შედეგად მიღებული გადაწყვეტილებები, რითაც დასტურდება, რომ კანდიდატი გამოირჩევა სათანადო წერის უნარით. მის მიერ წარმოდგენილი გადაწყვეტილებები და განჩინება შედგენილია მარტივი და გასაგები ენით.

კანდიდატი კარგად იყენებს და აანალიზებს სამართლებრივ ნორმებს. დასაბუთებისას გამოყენებული აქვს საქართველოს უზენაესი სასამართლოს და ადამიანის უფლებათა ევროპული სასამართლოს განმარტებები. ამასთან, შესწავლილ დოკუმენტებში თვალსაჩინო გრამატიკული ხასიათის შეცდომა არ გამოვლენილა.

ზეპირი კომუნიკაციის უნართან დაკავშირებით უნდა აღინიშნოს, რომ ლაშა თავართქილაძე გამოირჩევა გამართული მეტყველების უნარითა და სხვისი აზრის მოთმინებით მოსმენის თვისებით. კანდიდატმა საჯარო მოსმენაზე თანმიმდევრულად, ნათლად და ლოგიკურად გადმოსცა საკუთარი აზრი.

პროფესიული თვისებების, მათ შორის, სასამართლო დარბაზში ქცევასთან დაკავშირებით შეიძლება ითქვას, რომ ლაშა თავართქილაძე მიზანდასახული, პრინციპული, საქმისადმი ერთგული, ემოციურად გაწონასწორებული, კეთილსინდისიერი, თავშეკავებული პიროვნებაა. აღსანიშნავია, საქმეთა განხილვის თაობაზე მოწოდებული სტატისტიკური ინფორმაცია, რომლის თანახმად კანდიდატს საქმის განხილვის საპროცესო ვადები დაცული აქვს საქმეთა 84,3% შემთხვევაში, ასევე, საქმეთა 68,2% შემთხვევაში დაცული აქვს გადაწყვეტილების მომზადების საპროცესო ვადები. მის მიერ გამოტანილი გადაწყვეტილებები, ზემდგომ სასამართლოში გასაჩივრების შემდეგ, უცვლელი დარჩა საქმეთა 88,1% შემთხვევაში. კანდიდატს საანგარიშო პერიოდში (978 დღეში) დასრულებული აქვს 575 საქმე (დღეში საშუალოდ 0,6 საქმე).

კანდიდატის მიმართ არ არსებობს დისციპლინური წარმოების დაწყების შესახებ რაიმე ინფორმაცია.

შესაბამისად, მიმაჩნია, რომ ლაშა თავართქილაძე სამოსამართლო უფლებამოსილებას ასრულებს წარმატებით და კეთილსინდისიერად.

აკადემიური მიღწევებისა და პროფესიული წვრთნის მახასიათებლით კანდიდატის დახასიათებისას გასათვალისწინებელია, რომ ლაშა თავართქილაძეს აქვს თვითგანვითარების, ახალი ცოდნისა და უნარების შეძენის ინტერესი, მიღებულ ცოდნას კი წარმატებით იყენებს პრაქტიკაში. ლაშა თავართქილაძეს, 2007 წელს ჩაბარებული აქვს მოსამართლეობის საკვალიფიკაციო გამოცდა სამოქალაქო და ადმინისტრაციული სამართლის სპეციალიზაციით. 2003 წელს მან ჩააბარა პროკურატურის მუშაკთა საკვალიფიკაციო გამოცდა. 2006 წელს ჩააბარა ნოტარიუსის საკვალიფიკაციო გამოცდა. 2006 წელს ჩააბარა ადვოკატთა საკვალიფიკაციო გამოცდა, საერთო სპეციალიზაციით.

კანდიდატი აქტიურად მონაწილეობს სამართლებრივი სისტემისა და მართლმსაჯულების საკითხებზე გამართულ სამუშაო შეხვედრებსა და სემინარებში. ამასთან, კანდიდატი იყო საქართველოს იუსტიციის უმაღლესი სკოლის მსმენელი.

პროფესიული აქტივობის შესახებ შეიძლება ითქვას, რომ ლაშა თავართქილაძე აქტიურად მონაწილეობს მართლმსაჯულების საკითხებზე გამართულ სხვადასხვა ღონისძიებაში.

კერძოდ, ლაშა თავართქილაძემ მონაწილეობა მიიღო შემდეგ ღონისძიებებში: 2023 წლის 11-12 თებერვალი, ყვარელი, USAID-ის ეკონომიკური მმართველობის პროგრამის მხარდაჭერით ერთობლივად გამართული სამუშაო შეხვედრა „მეწარმეთა შესახებ საქართველოს კანონის აღსრულების პროცესთან დაკავშირებით“; 2023 წლის 14-16 ივლისი, კახეთი, საქართველოს სავაჭრო-სამრეწველო პალატის მიერ დაფუძნებული ა(ა)იპ „საქართველოს საერთაშორისო საარბიტრაჟო ცენტრის“ (GIAC) ორგანიზებით და ამერიკის შეერთებული შტატების კომერციული სამართლის პროგრამის (CLDP) მხარდაჭერით გამართული სამუშაო შეხვედრა - „ინფრასტრუქტურული პროექტებიდან წარმოქმნილი სამართლებრივი ურთიერთობების - დავების გადაწყვეტის მექანიზმების სპეციფიკა - ადგილობრივი და საერთაშორისო პერსპექტივები“; 2024 წლის 30 ნოემბერი - 1 დეკემბერი, თბილისი, გაეროს ლტოლვილთა სააგენტოს (UNHCR) ტრენინგი - „ლტოლვილთა სამართალი“ და სხვა.

ამდენად, **კომპეტენტურობის კრიტერიუმის** თითოეულ მახასიათებელთან მიმართებით კანდიდატის შეფასებისას გათვალისწინებულ იქნა მისი ცოდნა, კომპეტენცია, გამოცდილება, პროფესიული თვისებები, უნარ-ჩვევები და სხვა მნიშვნელოვანი მახასიათებლები. აღნიშნული ინფორმაციის შეგერებისა და შეფასების საფუძველზე კი დადგინდა, რომ **ლაშა თავართქილაძის** მიერ დაგროვილ ქულათა ჯამი მაქსიმალური 100 ქულიდან შეადგენს **89** ქულას.

შემფასებელი

ნიკოლოზ მარსაგიშვილი
თარიღი: 14.04.2025